

26. august 2014

UKA 2014/91

Inatsisartut Suleriaasianni § 36 innersuussutigalugu apeqquteqaat allaavigalugu Inatsisartuni oqallisissiamik siunnersuut imaattoq saqqummiuppara:

**Qanoq iliornikkut nunatta imartaani aalisartut kikkulluunniit nunatsinnut tulaassisussaataitanermik piumasaqarfigilerneqarsinnaanersut apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Saxtorph Didriksen, Siumut)

**Tungavilersuut:**

Nunatsinni aalisakkanik qalerualinnillu aalisarnermik suliffiuteqarlutik ingerlatsisut annertunerusumik piumasaqarfigineqarsinnaasariaqarput, pisaminnik nunatta umiarsualiviinut tulaassisussaataitanermik. Oqallinnermi ilanngunqartariaqarput EU-mut, Rusland-imut Norgemullu isumaqatigiissuteqarnikkut pisassiissutaasartut.

Nunatsinni ullumikkut aalisarneq tungaviusumik aningaasarsiornikkut isaatitsissutaanerpaajuvoq. Isumaqarpunga piumasaqaateqarnissarput pisariaqartoq, aalisarnerup nunatsinnut innuttaasunullu iluaqutaanerunissaa siunertaralugu.

Tulaassisussaataitaneq inuiaqatigiit ulluinnarni inuuniarnerannik oqilisaataasinnaavoq, tassami aalisakkat tunisassiassatut suliareqqaarlugit nalitunerulersissinnaagatsigit. Tulaassisussaataitaneq aamma Royal Arctic Line-p kaaviaartitaasa annerunerulerneranik kinguneqarsinnaavoq, tamannalu inuiaqatigiit aningaasaqarniarnerannut iluaqutaassaaq.

Tulaassisussaataitaneq suliffissanik pilersitsissaaq. Aammalu kilisaatit nunatsinni niuernerulernissaat ilimagisinnaavarput, tassami tulannerminni niuernerulissagamik (taquassanik, orsusanik allanillu), tamannalu nunatsinni niuernerup annertusineranik kinguneqassaaq – nunatsinni kaaviaartitsinerulerneramik nassataqartoq.

Aamma taanngitsoorusunngilara tulaassisussaataitaneq piumasaqaataasannngimmat EU-mut, Rusland-imut Norgemullu isumaqatigiissusiortarnerni, avaleraasartoorniarnerni, raajarniarnermi qalerallinniarnermilu akileraartussaataitaneq eqqaassanngikkaanni.

Aalisakkanik qerititsiinnartarneq nunatta annertunerusumik aalisakkeriveqannginneranut peqqutaqaataalluinnarpoq tamannalu oqallisissiamut uunga attuumassuteqarlunnaarpoq. Aalisakkat nunatta avataani suliareqqitassanngorlugit nassiunneqartartut annertuallaarsoraakka. Taamaattorli

isumaqarpunga nunanut allanut amutsiviliartarnermut atatillugu pisanik tunisisarneq, imaluunniit pisassanik nunguutsinermi pisat kingiulliit nunami allami tunineqartarnerat periarfissaajuaannartariaqartoq.

Siunissami nunatta naalagaaffinngornissaa eqqarsaatigalugu nunanit allaniit imartatsinni aalisartunut piumasaqaateqatarnissarput tunngavissaqarpoq.

Taamatut oqaaseqarlunga uummaarissumik oqallinnissarput kissaatigaara.